

四庫全書

史部

欽定四庫全書

欽定續通志卷二百七十八

列傳

唐七十八

藩鎮盧龍

李懷仙

朱滔

劉怱

濟總

朱克融

李載義

楊志誠

張仲武

直方

張允伸

張公素

李茂勲

李全忠

劉仁恭

李懷仙柳城人世事契丹降將

宋新唐書無降將二字
營州為唐羈縻州以處

降者去降將二字則懷仙入
唐始末不明今據舊書增

守營州祿山反以為裨將

史思明盜河南留次子朝清守幽州以阿史那玉高如

震輔之朝義弒立移檄誅朝清二將亂朝義以懷仙為

幽州節度使督兵馳入如震不及計乃出迎懷仙外示

寬居三日大會斬如震州部悉平朝義敗將趨范陽中

人駱奉先間遣鎬說懷仙遂降使其將李抱忠以兵三

千戌范陽朝義至抱忠不內乃縊斬其首因奉先以獻
僕固懷恩即表懷仙為盧龍軍節度使遷檢校兵部尚
書王武威郡屬懷恩反邊羌挈戰不解朝廷方勤西師
故懷仙與田承嗣薛嵩張忠志等得招散亡治城邑甲
兵自署文武將吏私貢賦天子不能制大厯三年麾下
朱希彩朱泚泚弟滔謀殺懷仙斬閭者以入希彩不至
遂明泚懼欲亡滔曰謀不成有死逃將焉往俄希彩至
共斬懷仙族其家希彩自稱留後張忠志以兵討其亂

不克代宗因赦罪詔宰相王縉為節度使以希彩副之
希彩聞縉至蒐卒伍大陳戎備以逆縉建旌祭徐驅希
彩迎謁恭甚縉度不可制勞軍閱旬乃還希彩即領節
度五年封高密郡王驚恣不軌人不堪七年其下李瑗
殺之共推朱泚為留後泚自有傳

朱滔性變詐希彩以同宗倚之使主帳下親兵泚領節
度遣滔將兵三千西塞安史後山東雖外臣順實傲
肆不廷至泚首效款帝嘉之召見殿中問曰卿材孰與

泚多滔曰統御士衆方略明辨臣不及泚臣年二十八
獲謁天子泚長臣五年未識朝廷泚不及臣帝愈喜特
詔勒兵貫玉城出屯涇州置酒開遠門餞之戍還乃謀
奪泚兵詭說曰天下諸侯未有朝者先至可奪天子意
子孫安矣泚信之因入朝稍不相平泚遂乞留西討吐
蕃以滔權知留後兼御史大夫滔殺有功者李瑗等二
十餘人李惟岳拒命滔與成德張孝忠再破之東鹿取
深州進檢校司徒遂領節度賜德棣二州德宗以康日

知為深趙二州團練使詔滔還鎮滔失深州不平又請
恒定七州賦供軍復不許愈怨時馬燧圍田悅悅窮間
滔與王武俊同叛滔姑子劉怱為涿州刺史以書諫曰
司徒身節制太尉位宰相恩遇極矣今昌平有太尉鄉
司徒里不朽業也忠順則無不濟比忘上樂戰不顧成
敗如安史者今復何有司徒圖之無貽悔滔不從激其
衆曰士喋血關既下堅城朝廷乃見奪奏賞不報君等
疾趨破馬燧軍以取資糧可乎軍中不應三號之乃曰

幽人死於南者骸撐不捨痛藏心髓奈何復欲暴骨中
野乎司徒兄弟受國寵士各是官賞願安之不卹其它
滔罷潛殺不共亂者數十人日知發其謀於熒帝以悅
未下即封滔通義郡王實戶三百滔愈悖分兵與武俊
屯趙州魯日知矯詔發其糧即引兵救悅次東鹿軍大
譟曰天子令司徒北還而南救魏寧有詔邪滔懼走匿
傅舍裨將蔡雄好諭士曰始天子約取成德所得州縣
賜有功者拔深州者燕也本鎮常苦無絲縷冀得深州

以佐調率令顧不得又天子以帛賜有功士為馬燧掠去今引而南非自為也軍中悔謝復曰雖然南行違詔

莫如還滔回次深州誅二百人

按新書原文誅首變者二百人軍士不從滔亂

不得被以惡名今刪

衆懼乃率兵南壁寧晉與武俊合帝命馬燧

李懷光擊之滔屬鄭雲達田景仙皆奔燧已而滔破懷

光軍悅德滔援欲尊而臣之滔讓武俊曰篋山之勝王

大夫力也於是滔武俊官屬共議古有列國連衡共抗

秦今公等在此李大夫在鄆請如七國竝建號用天子

正朔且師在外無名豈長為叛臣宜擇日定約順人心
不如盟者共伐之滔以祿山思明皆起燕惡其名以冀

堯所都因號冀武俊號趙悅號魏納號齊建中三年冬
十月庚申為壇魏西祀天各僭為王皆三讓就位滔為

盟主稱孤武俊悅及納稱寡人

崇新唐書有雲氣土高
之應此乃亂賊造作附

會以相矜煽無
足稱道今刪

居室皆曰殿妻曰妃子為國公下皆稱

臣謂殿下上書曰牋所下曰令置左右內史視丞相內
史令監視侍中中書令東西侍郎視門下中書東曹給

事西曹舍人視給事中中書舍人司議大夫視諫議大夫六官省視尚書東西曹僕射視左右僕射御史臺曰執憲置大夫至監察御史驅使要藉官曰承令左右將軍曰虎牙豹畧軍使曰鷹揚龍驤滔改幽州為范陽府以子為留後稱元帥劉怦為留守柳良器李子千左右內史滔兄瓊瑰陵慶東西曹僕射楊霽馬寶冠瞻楊榮國司文司武司禮司刑侍郎李士真樊播執憲大夫中丞聘處士張遂王道為司諫燧遣李晟將兵至易定率

張茂昭攻涿莫以絕滔援明年圍清苑滔將鄭景濟固
守滔使馬寶將兵萬人與武俊拒燧自以兵萬餘救清
苑絕晟糧道至定州晟不知夜引兵還滔疑有伏不敢
逼遽保瀛州而孝忠晟合兵千人城萊水滔驍將烏薩
戒襲殺城卒數百晟不出景濟望滔軍立幟為應滔進
軍薄晟營晟戰不利城中兵亦出晟大敗奔易州茂昭
走滿城滔已破晟回屯河間不進武俊使宋端趣讓滔
怒曰孤亟戰且病就醫藥而王已復云云孤南救魏棄

兄背君如脫屣王必相疑亦聽所為端還武俊謂實曰寡人望王速來指蹤決勝負復何惡王異日并天下寡人得六七城為節度足矣實還具道所以然武俊亦遣謝滔滔悅亦報謝然武俊內銜之與田悅潛謀絕滔及泚反燧等皆班師武俊實亦還悅武俊遣使至河間賀泚即位武俊詭請實共攻康日知於趙州謀覆其軍不克實歸武俊厚贈遺泚遣人密召滔使趨洛陽滔發書西向再拜移檄諸道曰今發突騎四十萬走洛陽與皇

帝會上陽宮使王郅說悅連和俱西滔素彊調欽武俊等不能堪又令各以兵五千從攻洛欲僭稱帝乘輿法從及赦令皆具初回紇以女妻奚王大厯末奚亂殺王女逃歸道平盧滔以錦繡張道待其至請為婚女悅許焉遣修媚禮於回紇回紇喜報以名馬重寶及僭相王與武俊悅納四金鑰於回紇曰四國願聽命於可汗謹上金鑰啟閉出納唯命至是乞師焉回紇以二千騎從而武俊亦先乞師斷懷光餉路未至而王師還回紇

過幽州滔使啗其酋達干曰若能同度河而南玉帛子女不貲計可得也達干許諾約曰五十里舍以須悅軍滔兵五萬車千乘騎二萬士私屬萬餘虜兵三千馬橐它倍之過武俊境武俊盛勞之然悅已用武俊謀不肯出儲峙于野以待滔至貝州悅刺史邢曹俊上謁即歸閉城守滔疑之次永濟武俊陰遣客反間滔曰悅有憾須公南以兵斷公歸路宜少脩滔怒入永濟執悅吏掠訊不得殺之使回紇大掠南及澶衛繫執老幼無遺者

悅大恐闔城自保滔遣將楊布略定館陶屯平恩置官
吏滔整軍北還使馬寶屯冠氏聞悅死遂攻魏州圍貝
州於是武俊李抱真合擊滔滔急召寶至貝州步馬乏
頓明日輒約戰寶請休士三日蔡雄達千等畏武俊堅
壁難圖請戰楊布曰大王將取東都逢小敵即怯何以
長驅天下術士尹少伯亦言必勝既戰為二軍所乘大
敗大將朱良祐李進皆被執滔奔入德州殺少伯雄布
俄而京師平滔已敗不能軍走還幽州上書待罪詔武

俊抱真開示大信若誠心審固者當與更始初滔以劉
忸忠力使留守及敗疑圖已傍徨不敢入忸聞其至蒐
兵善鎧夾道陳二十里迎謁望滔哭滔遂入府氣沮索
日邑邑被病政事悉委忸貞元元年死年四十二贈司
徒

劉忸幽州昌平人少爲范陽裨將以親老疾輒去職李
懷仙檄召不應朱滔時積功至雄武軍使墾田節用以
辦治稱稍遷涿州刺史滔討田承嗣表知府事和裕得

衆心李寶臣以兵劫滔于瓦橋滔走寶臣乘勝欲襲幽
州怱設方畧勒兵完守寶臣不敢謀擢御史中丞滔敗
歸終不貳益治兵人嘉怱忠於所奉及滔死軍中盡推
怱乃總軍事俄詔為節度副大使彭城郡公居鎮纔三
月死年五十九贈兵部尚書諡曰恭

子濟游學京師第進士歷莫州刺史怱病詔濟假州事
及怱死嗣節度累遷檢校尚書右僕射同中書門下平
章事奚教侵邊擊走之窮追千餘里至青都山斬首二

萬級及掠檀薊北鄙濟率軍會室常破之王承宗叛濟
合諸將曰天子知我怨趙必命我伐之趙且大脩我奈
何裨將譚忠欲激濟代承宗疾言曰天子不使我伐趙
趙亦不備燕濟怒擊之使視趙果不設脩數日詔書訐
濟無出師濟釋忠謝而問之忠曰昭義盧從史外親燕
內實忌之外絕趙內實與之此為趙畫曰燕倚趙自固
雖甚怨必不殘趙故不足虞也趙既不備燕從史則告
天子曰燕趙宿怨也今趙見伐而不備燕是燕反與趙

此以知天子不使君伐趙趙亦不備燕濟曰計安出曰
今天子誅承宗而燕無一卒濟易水者正使潞人賣恩
於趙販忠於上是君貯忠誼心而染私趙之名卒不見
德於趙惡心徒嘈嘈於天下濟然之以兵七萬先諸軍
斬首數千級又拔饒陽屯瀛州進攻安平久不拔濟命
次子總以兵八千先登日中拔其城會赦承宗進中書
令濟之出留長子緄假副使總為行營都知兵馬使濟
病甚總與左右張玘成國寶及帳內親近謀使人詐從

京師來曰朝廷以公前屯瀛州逗遛詔副大使代節度
明日復使人曰詔節至太原矣又使人走呼曰過代矣
舉軍驚濟憤怒不知所為誅主兵大將數十人及素與
緄善者亟追緄以玘兄舉代留事濟自朝至中昃不食
渴索酖漿總使吏唐弘實寘毒濟飲而死年五十四緄
至涿州總矯濟命殺之乃發喪贈太師謚曰莊武

總性陰賊尤險譎已毒父即領軍政朝廷不知其姦詔
嗣節度封楚國公累進檢校司空承宗再拒命總遣兵

取武彊按軍兩端以私饋賚憲宗知之外示崇寵進同
中書門下平章事及吳元濟李師道平承宗憂死田弘
正入鎮州總大恐謀自安又數見父兄為崇乃衣食浮
屠數百人晝夜祈禳總祠場則暫安或居臥內輒驚不
能寐晚年益慘悽譚忠復說總曰天地之數合必離離
必合河北與天下離六十年數窮必合往朱泚希烈自
立趙冀齊魏稱王郡國弄兵可謂危矣然卒無事元和
以來劉闢李錡田季安盧從史齊蔡之彊或首于都市

或身為逐客皆君目見今兵駸駸北來趙人已獻德棣
十二城助魏破齊唯燕無一日勞後世得無事乎為君
憂之總泣且謝因上疏納土請為浮屠割所治為三以
幽涿營為一府請張弘靖治之瀛莫為一府盧士玫治

之平薊媯檀為一府薛平治之

按吳縝糾謬云穆宗紀
劉總以盧龍八州歸于

有司赦幽涿檀順瀛莫營平八州崔植傳劉總以幽薊
七州獻諸朝溫造傳總藉所部九州入朝而總傳上疏
欲割所治幽涿營為一府瀛莫為一府平薊媯檀為一
府然則總所歸之地在崔植傳則七州在本紀則八州
在溫造及總傳則九州以州名參考之則十州外駸至
此考舊唐書地理志范陽節度純九軍幽檀媯薊恒定

易莫洽平盧節度統二軍營平此定制也後范陽節度
兼領平盧而恒定易入于成德軍瀛州來隸平盧軍又
朱希彩析幽州之范陽歸義固安置涿州然則總傳九
州正合至紀所列與傳異者有順州考新書方鎮表廣
德元年范陽節度罷領
順州紀誤崔植傳亦誤盡籍宿將薦諸朝會穆宗沖逸

宰相崔植杜元穎無遠謀欲重弘靖故全付總地唯分
瀛莫置觀察使拜總檢校司徒兼侍中天平節度使又
賜浮屠服號大覺榜其第為佛祠遣使者以節印偕來
時總已自髡祝讓節印以浮屠行始總請代獻馬萬五
千匹羣臣或疑其詐帝獨納之使給事中薛存慶宣慰

給所部復一歲緡錢百萬勞軍高年惇獨不能自存者
官吏就問賜粟帛總遂與忠俱行軍中世懷其惠擁留

不得進總殺首謀者十人以節付張臯

按通鑑考異引實錄幽州留後

張玘奏總剃髮為僧不知所在臯乃玘兄然則不以節付臯也然總以夜去臯或不知今仍之夜間道

去遲明軍中乃知及定州死

按藩鎮傳諸人皆書死獨總書卒蓋以其納土之故

然總身弑父厥罪雖均今改書死

詔贈太尉子璣及弟約至長安者十

一人皆擢州刺史忠護總喪至亦卒

朱克融滔孫以偏校事劉總總將入朝慮後有變籍其

軍材勇黠暴者悉荐之朝冀厚與爵位使北方歆豔無
甘亂心克融在遣時執政非其人既見總納地謂天下
曠然無復事克融等留京師久之不得調數詣宰相求
自試皆不聽饑寒無所貸丐內怨忿會張弘靖赴鎮因
恚遣還俄幽州亂囚弘靖克融父洄號智譎疾廢臥家
衆往請為帥洄辭因推克融領軍務詔以劉悟為節度
使馳往俄而瀛冀皆附克融悟不得入克融縱兵掠易
州敗兩縣寇蔚州易州刺史柳公濟戰白石嶺斬三千

級轉寇定州節度使陳楚破其兵二萬會鎮州殺田弘
正議者謂二賊均逆而克融不敢害弘靖宜誅趙赦燕
朝廷度燕薊未可復取乃拜克融檢校左散騎常侍幽
州盧龍節度使長慶元年也明年滔弓高攻下博與王
廷湊共圍深州裴度以檄譙諭克融乃還進檢校工部
尚書表獻馬萬匹羊十萬請真賞軍敬宗初遷檢校司
空賜邊屯時服克融以帛疏惡囚詔使楊文端又言聞
東幸雖願率匠五千助營宮室且請帛三十萬脩軍費

帝用裴度謀屈之語在度傳

按此事在裴度傳甚詳從史家互見例

進爵

吳興郡王是年軍亂殺克融及其子延齡詔贈司徒次子延嗣領留後為大將李載義殺而代之并族其家

李載義自稱恒山愍王之後劉濟引補帳下從征伐積多為牙中兵馬使朱克融死子延嗣叛命載義因衆不忍殺之暴其罪于朝敬宗即授檢校戶部尚書盧龍軍節度使封武威郡王初張弘靖之囚幕府多見害妻子留不遣及是載義悉護送京師俄而李同捷據滄景邀

襲封載義請討賊自效文宗嘉之進檢校尚書右僕射
斬級數有功賊平詔同中書門下平章事賜白玉帶示
殊禮太和四年為兵馬使楊志誠所逐奔易州即上言
願將妻子身入見帝令使者抵太原慰迎賜抱笏裝器
又以其嘗有功且意恭順乃冊拜太保仍平章事俄為
山南西道節度使徙河東始回鶻使者歲入朝所過暴
慢吏不敢何禁益警悍至鞭候人剽突市區大酋李暢
曉華語尤凶黠橫須索扶疾郵人載義召暢語曰可汗

以舅甥故使將軍朝貢誼不容將軍暴也天子原饗餽禮客
有不謹吏皆論死若將軍所部不戰敗攘自如我必殺
犯者將軍其少戒因悉罷防兵以兩卒護闔暢憚之訖
無犯者進兼侍中吏下請立碑紀功詔李程為之辭未
有字帝詔曰周書凡厥正人既富方穀卿宜當之以方
穀為字開成三年卒年五十贈太尉初載義母葬范陽
為楊志誠掘發後志誠被逐道太原載義奏請剔其心
償母怨不許又欲殺之官屬苦救乃免然盡戕其妻息

士卒帝屈法弗劾也

楊志誠事載義為牙將載義宴天子使者鞠場志誠與其黨譟而起載義走因自為都知兵馬使文宗更以嘉王領節度用志誠為留後俄檢校工部尚書擢節度副大使踰年進檢校吏部詔下邸吏白宰相曰軍中不識朝儀惟知尚書改僕射為進秩今一府盛服待天子命如復為尚書則舉軍慙使者勢不得出既志誠果怨望軍有謾言囚中人魏寶義及它使焦奉鸞尹士恭遣部

將王文穎入謝讓還所命復賜之文穎不肯受輒去帝
忍不責乃進檢校尚書右僕射八年為下所逐推部將
史元忠總留後志誠在鎮密製天子衮冕被服擬乘輿
元忠表于朝詔御史按治斥嶺南至商州誅之而以通
王領節度授元忠留後明年檢校工部尚書為副大使
會昌初為偏將陳行泰所殺行泰邀節制未報次將張
絳殺行泰起求帥軍武宗自用張仲武代之

張仲武范陽人通左氏春秋會昌初為雄武軍使行泰

殺元忠請節李德裕言河朔請帥報太速故軍得安若
少須下且有變帝許之未報果為絳所殺復誘其軍以
請亦置未報時回鶻為黠戛斯所破烏介可汗託天德
塞上仲武遣屬吳仲舒入朝請以本軍擊回鶻德裕因
問北方事仲舒曰行泰絳皆遊客人心不附仲武舊將
張光朝子年五十餘通書習戎事性忠義願歸款朝廷
舊矣德裕曰即以為帥軍無復亂乎答曰仲武得士心
命之必有逐絳者德裕入白帝曰行泰等邀節不可許

仲武求自效用之有名軍且無辭乃擢兵馬留後而詔
撫王領節度詔下絳果為軍中所逐即拜仲武副大使
檢校工部尚書蘭陵郡公會回鶻特勒那頡頏擁赤心
部七千帳逼漁陽仲武使其弟仲至別將游奉寰等率
銳兵三萬破之進檢校兵部尚書始回鶻常有酋長監
奚契丹督歲貢因詞中國仲武使裨將石公緒等厚結
二部執謀者八百餘人殺之回鶻欲入五原掠保塞雜
虜乃先以宣門將軍四十七人詭結歡仲武賂其下知

之乃逗遛不遣使失師期回鵲人馬多病死由是不敢
犯五原塞烏介失勢往依康居盡徙餘種寄黑車子部
回鵲遂衰名王貴種相繼降捕幾千人仲武請立石紀
聖功詔德裕為銘揭碑盧龍大中初又破奚北部及山

奚擢累檢校司徒同中書門下平章事卒諡曰莊

按王承元

順朝命易它鎮故不從其父兄別為專傳張仲武有功
於唐且無跋扈事視當時諸人為特出但父子相襲猶
踵河北故智故仍入藩鎮傳
亦以叙次承授便于貫串也

子直方以右金吾將軍襲留後俄進副大使多不法畏

變起乃託出畋奔京師軍中以張允伸總後務直方至
宣宗遣使者郊勞授金吾大將軍以其族大給檢校工
部尚書俸久之進檢校尚書右僕射坐以小罪笞殺金
吾史改右羽林統軍好馳獵往往設置罟於道當宿衛
不時入下遷驍衛將軍奴婢細過輒殺積其罪貶思州
司戶參軍母驚曰尚有尊於我子邪久復授羽林統軍
縱部下為盜復貶康州司馬後居東都弋獵愈參洛陽
飛鳥皆識之見必羣噪乾符中累進左驍衛大將軍鄭

欽定四庫全書

欽定續通志
卷二百七十八

十八

畋輔政頗言仲武會昌時功第一今直方百口不自存
每內燕以衣敝惡辭不赴陛下錄功念舊宜少優假詔
還檢校右僕射進左金吾衛大將軍黃巢犯京師直方
迎灞上既而納亡命謀劫巢報天子公卿多依之賊覺
屠其族

張允伸字逢昌范陽人世為軍校直方出奔以都知兵
馬使為衆推留後報可未幾檢校散騎常侍為節度使
累進檢校司徒兼太傅同中書門下平章事封燕國公

龐勛反上書欲遣弟允臯領兵討賊不許上米五十萬斛鹽二萬斛詔嘉美進兼侍中咸通十二年以疾甚上節印詔許以子簡會為副大使卒年八十八贈太尉謚曰忠烈允伸性勤儉下所安刺未嘗有邊鄙虞子十四人簡會入朝昆弟多至大將軍刺史郡佐者而軍中推張公素為留後

公素范陽人以列將事允伸擢累平州刺史允伸卒以兵來會喪軍士素附其威望簡會知不可制即出奔詔

公素為節度使進同中書門下平章事為李茂勲所襲
奔京師貶復州司戶參軍

李茂勲本回鶻阿布思之裔張仲武時來降沉勇善射
仲武器之以將兵常乘邊積功賜名姓陳貢言者燕
健將為納降軍使軍中素信服茂勲襲殺之因舉兵給
稱貢言反公素迎擊不利走茂勲入府衆始悟因推主
州務詔即拜節度使俄以病自上詔進尚書右僕射致
仕表子可舉代遂領畱後進節度使擢累檢校太尉中

和未太原李克用始大興定州王處存結可舉惡其窺
山東為已患乃約吐渾都督赫連鐸鎮州王鎔聯和暢
言易定本燕趙屬得其地且參有之即遣軍司馬韓玄
紹擊沙陀藥兒嶺斬首七千級殺其將朱邪盡忠等又
戰雄武軍殺獲萬人鐸又破沙陀於蔚州詔以鐸為雲
州刺史進可舉檢校侍中乃遣票將李全忠率衆六萬
圍易州鎔以兵攻無極處存求援太原克用自將赴之
鎮人懼退保新城克用急攻之鎔引去追破之九門易

久未下廬龍劉仁恭穴地入得其城士卒有驕色處存
以輕兵三千蒙羊皮夜布之野精騎伏它道全忠遁盡失
為羣羊爭趨之伏騎發大敗之復取易州全忠遁盡失
芻糧伏鎧懼得罪乃裒餘衆反攻幽州可舉度不支引
其族登樓自燔死

李全忠范陽人仕為棣州司馬蘆生其室一尺三節以
問別駕張建建曰蘆茅類公茅土兆也傳節者其三世
乎罷歸事可舉為牙將可舉死衆推為留後光啓元年

拜節度使未幾卒子匡威嗣領留後進為使性豪爽恃
燕薊勁兵處有雄天下意與赫連鐸共攻太原爭雲代
李克用使安金俊攻鐸匡威救之戰蔚州射殺金俊共
表請討沙陀而朱全忠亦上言願協力故張濬因請用
兵濬敗克用攻雲州以騎將薛阿檀為前鋒設伏河上
鐸追阿檀抵河伏起大敗遂圍雲州塹而守分兵出井
陘屯常山大掠深趙匡威以步騎萬餘援王鎔克用還
因急攻鐸會食盡鐸棄州奔匡威克用取雲州鐸本吐

谷渾部首開成中其父率種人三千帳自歸守雲州十五年至是失景福初克用伐鎔鎔來求救匡威遣將赴之克用去明年兵復出井陘匡威自將援鎔將行置酒大會其弟兵馬留後檢校司徒匡籌妻張豔匡威酒酣報之匡威軍次博野匡籌乃據城自為留後即授檢校太保節度使匡威麾下多去并營無所歸留深州遣屬李抱貞上書願入朝時京師數寇難人人危懼傳言金頭王且來皆亡竄山谷抱貞還而鎔已迎館于鎮匡威

引抱貞登城西大悲浮屠顧望流涕美其山川乃共圖
鎔陽為鎔方畧繕甲治城塹陰施予傾士心鎮軍忠於
王氏皆惡之匡威親忌日鎔過慰士裒甲劫鎔入牙城
鎮人拒之鎔得脫鎮人斬匡威以徇匡籌訴諸朝檄暴
鎔罪攻樂壽武彊以報始匡籌之奪也燕人不義之劉
仁恭出奔太原克用倚其謀下武媯二州敗匡籌於居
庸關李存審與戰匡籌又敗挈其族奔京師次景城滄
州節度使盧彥威殺之掠車馬僮奴妻方乳不能進仁

金史卷一百一十八
恭獲之納于克用始匡威見逐歎曰兄失弟得無所悔
然其材恐不足以守果亡而幽州地歸克用以仁恭為
帥

劉仁恭深州人父晟為李可舉新興鎮將故仁恭事軍
中從李全忠攻易州以能穴地道號窟頭稍遷裨校嘗
自言夢大幡出指端年四十九當秉旄節李匡威惡之
補景城令會瀛州亂殺守吏仁恭募士千人定其亂匡
威復使將兵戍蔚州踰期未代士皆怨會匡籌逐其

兄仁恭擁戍兵趨幽州匡籌逆戰敗之遂以其族奔太原李克用待之甚厚拜壽陽鎮將數以策干克用請步騎一萬東取幽州已為導克用攻匡籌匡籌遁去仁恭與符存審入城封府庫以待克用悅留仁恭守之以親信分典其兵乾寧二年表仁恭檢校司空盧龍軍節度使明年克用攻魏州召盧龍兵仁恭以契丹解又明年克用復興其兵救朱瑄使者數十往卒不出克用以書讓之仁恭乃慢罵執其使盡囚太原士之在燕者復誘

克用麾下歸之克用怒自將往擊不勝師喪過半仁恭
獻馘於朱全忠全忠表同中書門下平章事既與克用
絕則益募兵光化初使其子守文襲滄州節度使盧彥
威棄城走遂有滄景德三州地用守文為節度留後請
命于朝昭宗未即從會中人至仁恭嬖謂曰旄節吾自
有要假長安本色耳何見拒邪卒以守文為橫海軍節
度使

按守文得節事新唐書不載從五代史補

由是益張悉幽滄步騎十萬

聲言三十萬南徇魏鎮屠貝州羅紹威求救於朱全忠

全忠使李思安葛從周赴之屯內黃仁恭負彊下令曰
思安懦當先破之乃取魏守文與單可及精甲五萬循
清水上思安設伏逆戰偽不勝守文躡北至內黃思安
整兵還擊伏發斬可及獨守文挺逸衆無還者從周以
邢洺兵與魏將賀德倫等夜擊仁恭破八屯仁恭走自
魏抵長河數百里尸蔽道鎮人邀敗之東境仁恭遂衰
三年葛從周攻滄州仁恭壁乾寧從周潛軍戰老鴉隄
仁恭敗退壁瓦橋卑辭歸窮於克用求救克用為侵邢

洛俄而全忠取瀛莫克用使周德威出飛狐天祐三年
全忠自將攻滄州壁長蘆仁恭悉發男子十五以上
為兵涅其面曰定霸都士人則涅于臂曰一心事主得
衆二十萬屯瓦橋全忠環滄而溝之援絕人相食仁恭
求戰不許復從克用乞師使百輩往乃許仁恭以兵三
萬合攻潞州降全忠將丁會滄圍乃解時中原多故仁
恭倚燕彊且遠無所憚意自滿從方士學長年藥館大
安山掠子女充之以董土為錢斂真錢穴山藏之殺匠

滅口禁南方茶自擷山為茶號山曰大恩以邀利子守
光烝嬖妾事覺仁恭謫之李思安來攻屯石子河仁恭
居大安山城中無備守光引兵出戰思安去因回攻大
安虜仁恭囚別室遂有廬龍守光事具五代史

欽定續通志卷二百七十八

欽定四庫全書

欽定續通志卷二百七十九

列傳

唐 七十九

蒲鎮淄青橫海

李正己

納師古
師道

程日華

懷直
懷信

李全略

同投

李正己高麗人為營州副將從侯希逸入青州希逸母

即其姑故薦為折衝都尉寶應中從討史朝義時回紇恃功橫正己欲以氣折之與大酋角逐士皆牆立觀約後者批之既逐而先正己批其頰矢液流離衆軍粲然酋大慙自是沮希逸以為兵馬使以其得衆心陰忌之因事解其職尋逐希逸詔代為節度使本名懷玉至是賜今名遂有湍青齊海登萊沂密德棣十州與田承嗣薛嵩李寶臣梁崇義相倚嵩死李靈耀反諸道共披其地正己復取曹濮徐兗鄆凡十有五州號最彊大政令

嚴酷威震鄰境。歷檢校司空。加同中書門下平章事。以
司徒兼太子太保。封饒陽郡王。附屬籍。因徙治鄆。以子
納及腹心將守諸州。建中初。聞城汴州。乃約田悅。梁崇
義。李惟岳。偕叛。自屯濟陰。益師徐州。扼江淮。天子於是
改運道。檄天下兵為守備。河南騷然。會發疽。死年四十。
九興元初。納順命。詔贈太尉。

納少時將兵。防秋代宗。召見擢殿中丞。賜金紫。入朝。擢
兼侍御史。正己。署為濮。徐。兗。沂。海。留後。進御史大夫。正

已死秘不發以兵會田悅于濮陽馬燧方擊悅納使大將衛俊救之為燧所破略盡收洹水德宗詔諸軍合討其從父洧以徐州歸大將李士真以德州李長知以棣州送款納惠洧背已集兵攻洧帝命劉玄佐督軍進援大破之納還濮陽進圍之納登陴泣且悔遣判官房說與子弟質京師因玄佐謝罪時中人宋鳳朝以納窮欲立功建不可赦帝乃械說等納還郢與悅李希烈朱滔王武俊連和自稱齊王署百官興元初復歸命授檢校

工部尚書復平盧帥節賜鐵券又同中書門下平章事
封隴西郡王希烈圍陳州納會諸軍破之城下加檢校
司空實封五百戶進檢校司徒死年三十四贈太傅子
師古師道

師古以蔭署青州刺史納死軍中請嗣帥詔起為右金
吾衛大將軍本軍節度使初棣州有蛤蜊鹽池歲產鹽
數十萬斛李長卿以州入朱滔獨蛤蜊為納據後德棣
入王武俊納乃築壘德州南跨河以守蛤蜊謂之三汭

通魏博以交田緒盜掠德州武俊患之師古始襲武俊
易其弱率兵取蛤蜊三汭師古使趙錡拒戰德宗遣使
者諭武俊罷兵師古亦隳三汭聽命嘗怒其僚獨孤造
使奏事京師遣大將王濟縊殺之貞元末進同中書門
下平章事德宗崩師古幸國喪欲攻掠州縣勒兵出次
聞順宗立乃罷累加檢校司徒兼侍中元和初死贈太
傅

師道師古異母弟也師古嘗曰是不更民間疾苦要令

知衣食所從乃署知密州師古病召高沐李公度等問
誰嗣二人未對師古曰豈以人情屬師道邪慮覆吾宗
及死沐公度與家奴卒立之請于朝制久不下師道謀
裒兵守境沐爭止更上書奉兩稅守鹽法請更朝廷憲
宗方誅劉闢未遑東討命建王審頊節度大使以師道
知留後加檢校工部尚書為副大使自正己以來雖外
奉王命而嘯引亡叛嚴法持下所付道必質妻子有謀
順者夷其家故能脅汙士眾傳三世云帝討蔡詔興諸

道兵不及鄆師道選卒二千抵壽春陽言助王師實欲
援蔡亡命少年為師道計曰河陰者江淮委輸河南帝
都請燒河陰教庫募洛壯士劫宮闕即朝廷救腹心疾
此解蔡一奇也乃遣客燒河陰漕院錢三十萬緡米數
萬斛倉百餘區又有說師道曰上雖志討蔡謀皆出宰
相而武元衡得君願為袁盎事後宰相必懼請罷兵蔡
圍解矣乃使人殺元衡傷裴度初師道置邠東都多買
田伊闕陸渾間以舍山棚遣將訾嘉珍門察部分之嵩

山浮屠圓靜為之謀元和十年大饗士郎中既衷甲矣其徒白官留守呂元膺以兵掩郎賊突出轉略畿部入山中數月奪山棚所市山棚怒道官軍襲擊盡殺之圓靜者年八十餘嘗為史思明將驍悍絕倫既執力士椎其脰不能折罵曰豎子折人腳且不能乃曰健兒因自置其足折之且死歎曰敗吾事不得見洛城流血留守防禦將都亭驛吏皆陰受師道署職故無知者及窮治嘉珍察乃害武元衡者

按盜殺武元衡事新書于元衡傳兩載張晏門察害嘉珍之獄

王承宗傳及此傳分系而無定辭通鑑又載田弘正入
郾開師道簿書有實殺武元衡入王士元等考張晏之
誅張弘靖即疑其不實王士元等之鞠雖致服而物色
異同即云恒郾同謀而真賊究無左驗史家分紀同屬
疑以傳疑亦以見唐失政刑如此大事不加窮治顧
預了獄則其它之不足扶姦謀而申國憲者多矣 鹽

鐵使王播又得嘉珍所藏弓材五千并斷建陵戟四十
七始師道欲知元濟虛實使劉晏平間道走淮西晏平
歸以為元濟必敗師道本倚蔡聞之怒以柳事殺晏平
及聞李光顏拔凌雲棚始大懼遣使歸順帝重分兵支
兩寇命給事中柳公綽慰撫之加檢校司空蔡平又遣

比部員外郎張宿諷令割地質子帥道乃縶三州遣子

弘方入侍宿既還師道中悔召諸將議皆曰蔡數州戰

三四年乃克公今十二州

按通鑑考異云李正己初據十五州李納拒命徐州歸朝

延德棟二州入于李
滔有十二州而已

何所虞大將崔承度獨進曰公初

不示諸將腹心而委以兵此皆嗜利者朝廷以一漿十

餅誘之去矣師道恚遣承度詣京師戒候吏待其還斬

之承度待命客省不敢還帝以其負約用左散騎常侍

李遜喻旨既至師道嚴兵以見遜責以背約師道懦暗

不自決私奴婢媼爭言先司徒土地奈何一旦割之今
不獻三州不過戰耳即不勝割地未晚師道乃以軍不
協為解帝怒削其官詔諸軍進討武寧節度使李愿使
將王智興破其衆斬二千級獲馬牛四千略地至平陰
橫海節度使鄭權戰福城斬五百級武寧將李祐戰魚
臺敗之宣武節度使韓弘拔考城淮南節度使李夷簡
命李聽趨海州下沭陽朐山進戍東海魏博節度使田
弘正身將兵自陽劉濟河拒鄆四十里而營再接戰破

三萬衆禽三千人陳許節度使李光顏攻濮陽收斗門
杜莊二屯弘正又戰東阿殘其衆五萬師道每聞敗輒
悸成疾及李祐取金鄉左右莫敢白師道遣將劉悟屯
陽穀當魏博軍疑其逗留悟懼不免引兵反攻城師道
晨起聞之白其嫂裴曰悟兵反將求為民守墳墓即與
弘方匿洩間就禽之師道請見悟不許復請送京師悟
使謂曰司空今為囚何面目見天子猶俯仰祈哀弘方
曰不若速死乃并斬之傳首京師初師古見劉悟曰後

必貴然敗吾家者此人也田弘正之度河也禽其將夏侯澄等四十七人詔悉赦之給繒絮還隸魏博義成軍父母在欲還者優遣賊皆感慰相告由是悟得行其謀師道首傳弘正營名澄驗之澄舐目中塵號絕良久悟素與師道妻魏亂妄言鄭公微之喬不死沒入掖廷它宗屬悉遠徙悟獨表師古子明安為朗州司戶參軍親將王承慶承宗弟也師道以兄女妻之潛約左右欲因肆兵執師道會悟入出奔徐州歸朝

程曰華定州安喜人始名華德宗以其有功益曰日華
父元皓為安祿山定州刺史故日華籍本軍為張孝忠
牙將滄故成德部州也德宗以畀義武前刺史李固烈
牢守孝忠令曰華往喻之固烈請還恒州悉帑以行軍
中怒殺固烈屠其家日華驚匿牀下將士出之逼領州
孝忠亦以日華寬厚遂假以刺史朱滔叛兵屯河間滄定
道阻滔招日華不納攻之曰華乘城自固參軍事李宇
謀曰城久圍府兵不為援今州十縣瀕海有魚鹽利自

給此軍本號橫海將軍能絕易定歸天子自為一州可
充盜喉襟能用僕計請至京師為天子言之日華乃遣
宇西帝果大喜拜御史中丞滄州刺史復置橫海軍即
以為使時建中三年也拜檢校工部尚書詔滄歲饋義
武錢十二萬緡糧數萬斛以宇為判官武俊欲得滄遣
人說日華歸己日華給曰敝邑為賊攻力屈則下之願
假騎二百抗賊賊退請以地授公武俊喜歸之馬日華
留馬謝其使武俊大怒與滔方睦懼有怨乃止久之武

俊歸命日華乃還馬以珍幣厚謝復結好武俊亦釋然
貞元二年卒贈兵部尚書子懷直擅知留事帝以日華
故拜權知滄州刺史宇入朝願析東光景城二縣置景
州且請刺史河朔刺史不廷授幾三十年帝嘉其志以
徐申為景州刺史升橫海軍為節度擢懷直為留後明
年為使九年來朝進檢校尚書右僕射懷直荒田獵出
輒數日不返帳下程懷信其從昆也閉門不納乃入朝
帝不罪更以虔王為節度使擢懷信留後以懷直兼右

龍武軍統軍明年懷信為節度使十六年懷直卒贈揚
州大都督後五年懷信死子懽襲領軍務詔授留後元
和元年拜節度使累進檢校兵部尚書封邢國公六年
入朝加檢校尚書右僕射權始名執恭嘗夢滄諸門悉
署權字乃改名以應之及淮西平惕不安丐入朝固辭
軍政詔華州刺史鄭權代之後以檢校司空為邠寧節
度使卒贈司徒宗族奉朝請宿衛者三十餘人

李全略本王氏名曰簡事王武俊為偏裨承宗時入朝

授代州刺史田弘正遇害穆宗以全略故鎮州將召問
全略多陳利害冀合帝意且請盡死報遂授德州刺史
時杜叔良敗博野故以全略為橫海軍節度滄德棣州
觀察使賜今姓名未幾使子同捷入朝既還即奏為滄
州長史押中軍兵馬帝不得已可其請全略陰規傳久
選材武結士心棣州刺史王稷善撫衆而家富于財全
略內忌計殺之族其家未幾死同捷領留後事求節敬
宗持久詔不下俄而文宗立同捷以帝新嗣位必大開

貸示四方乃遣弟同志同巽入朝使屬崔長奉表請命
詔拜兗海節度使以烏重胤代同投計窮矯言軍中留
已於是王智興請全軍出討魏博史憲誠令大將傅手
詔入于軍同捷不受詔削官爵命重胤率鄆齊兵進討
憲誠智興及汴滑李聽平盧康志睦易定張璠幽州李
載義以兵傳境同捷自以與成德有舊乃傾玉帛子女
市河北三鎮驩載義執使者獻諸朝王廷湊本闕橫海
欲乘隙取之引軍來援智興攻棣州引水灌城凡七月

其將張叔連降始刺史藥濛以同捷叛密上變事洩為
所害贈工部尚書智興進圍滄州是時帝且討王延湊
兵須夥繁置供軍糧料使以濟兩河諸將多張俘首冒
賞自重胤卒後李寰傳良弼不終事更以左金吾衛大
將軍李祐代智興將李君謀以輕兵絕河夜殘無棣降
饒安壁兵五千明年祐拔無棣平原詔行營堅壁務農
非被襲勿決戰而祐兵已薄德州帝遣諫議大夫柏耆
宣慰祐拔德州同捷益急乞降祐疑其詐耆引兵直入

城取同捷及家屬馳西祐入滄州者至將陵斬同捷傳
首京師詔貸四州一年租賦赦同捷母并妻息徙湖南
流崔長商州同異等以異母貸死

欽定續通志卷二百七十九

欽定四庫全書

欽定續通志卷二百八十

列傳

唐

八十

藩鎮宣武彰義澤潞

劉玄佐

士寧

吳少誠

少陽
元濟

劉悟

從諫
鎮

劉玄佐滑州匡城人少為縣捕盜犯法亡命從永平軍
為牙將大歷中李靈曜據汴州反玄佐襲取其宋州詔

以州隸永平節度使李勉即表署刺史建中初進兼御史中丞充宋亳穎節度使李納攻李洧於徐州詔立佐援洧大破納兵斬首萬餘級東南饒漕乃通進圍濮州徇濮陽皆下遂通濮陽津遷檢校兵部尚書兼曹濮觀察淄青兗鄆招討使汴滑都統副使李希烈之反立佐與李勉陳少游哥舒曜聯兵屯淮汝數困賊帝在奉天垂意關東乃詔檢校尚書左僕射同中書門下平章事希烈攻陳州立佐救之希烈走遂進取汴州詔加汴宋

節度使陳州諸軍行營都統玄佐本名洽至是賜名入
朝復兼涇原四鎮北庭兵馬副元帥檢校司徒玄佐貴
母尚在常月織絕一端示不忘本數教勅玄佐盡臣節
見縣令走廷中白事戒曰長吏恐懼卑甚吾思而父吏
於縣亦當爾而據案當之可安乎故玄佐待下益加禮
汴有相國寺或傳佛軀汗流玄佐自往大施金帛將吏
商賈走輸恐後籍所入得巨萬因以贍軍其權謫類若
此李納遣使至汴玄佐盛飾女子進之厚饋遺皆得其

陰謀故納最憚之所寵吏張士南及假子樂士朝貲皆巨萬而士朝私立佐嬖妾懼事覺酖立佐死年五十八贈太傅謚曰壯武軍中匿喪俟代帝亦為隱踰三日乃發喪使至帝問所欲立曰陝虢觀察使吳湊可乎監軍孟介行軍盧瑗以為便乃拜湊為節度使至汜水立佐柩將遷士請具禮瑗不許衆怒而譟起立佐子士寧於喪尊為留後帝召宰相議竇參曰汴人挾李納以邀命若不許勢且合遂以士寧為左金吾衛將軍嗣節度始

玄佐養子士幹與士朝皆來京師士幹知玄佐死無狀
遣奴持刀給為帛入殺士朝於次帝惡其專亦賜士幹
死士寧未授詔時私遣人結王武俊劉濟田緒等諸鎮
不直之皆執其使士寧忍暴手殺人杯案間又彊烝父
諸妾逼亂吏民妻女每畝獵數日乃還其下厭苦大將
李萬榮與玄佐同里寬厚得士心士寧引衆二萬畝城
南未還萬榮晨入府分兵閉諸門使告士寧曰詔書召
大夫宜速去不然且傳首士寧奔京師詔就第禁出入

拜萬榮兵馬留後遣兵西防秋兵素驕當戍者怨大校韓惟清張彥琳等請往不許使其子迺將未行彥琳等反攻萬榮不勝而潰惟清奔鄭州彥琳走東都萬榮恚誅其妻子衆不安乃呼於市曰大軍至城且破萬榮捕按之或言為士寧所教萬榮以聞斥士寧置郴州俄進萬榮節度使會病甚以兵屬鄧惟恭惟恭者與萬榮同里閑而署子迺為司馬萬榮死是夜惟恭執迺送京師杖死京兆府以董晉代之

吳少誠幽州潞人以廕官諸王府戶曹參軍事為荆南
節度使庾準牙門將從入朝道襄陽度梁崇義必叛密
畫計將獻天子李希烈以聞詔嘉美擢封通義郡王崇
義反希烈以為前鋒事平賜實封戶五十希烈叛少誠
為盡力及死推陳仙奇主後務既又殺之衆乃共推少
誠德宗因授申蔡光等州節度觀察留後自希烈以來
申蔡人劫於苛法習暴掠地少馬乘騾以戰號騾子軍
尤悍銳甲皆畫雷公星文以厭勝其屬鄭常楊冀欲劫

逐少誠以聽命不克被害貞元五年進拜節度使曲環
卒少誠間陳許無帥以兵攻臨潁圍許州德宗怒削官
爵合十六道兵進討于頔以襄陽兵戰吳房朗山禽其
三將王宗以壽州兵破賊於秋柵時師衆無統帥而宦
人監軍頗進退互為異見既戰小澱河諸道師未交而
潰乃詔韓全義為淮蔡招討處置使上官浣副之諸將
皆受節度與賊吳少陽等戰廣利城師復敗退營五樓
為賊所乘遂大潰全義及監軍賈英秀等夜遯保澱水

汴宋徐泗淄青兵走陳州少誠薄澠水而營全義懼退
保陳而潞滑河陽河中兵逃歸惟陳許將孟元陽神策
將蘇光崇壁澠水全義乃斬潞將夏侯仲宣滑將時昂
河陽將權文度河中將郭湘欲以振師不能也少誠引
還全義之敗少誠得帳中諸公書數百番持以給衆曰
朝廷公卿託全義破蔡日掠將士妻女為婢媵以激怒
其衆絕向順意少誠弱王師移書於英秀求昭雪帝召
大臣議宰相賈耽曰五樓軍退而少誠卷甲不追有自

新路劍南韋臯上言請擇重臣為統帥因薦渾瑊賈耽
陛下若重煩元老臣請以銳士萬人順流以翦元慙不
然因其請罪特加原洗罷兩河諸軍亦其次也使少誠
禍盈惡周變生帳下必其賊黨又當以官爵與之則一
少誠死一少誠生亦何足賴帝遂赦少誠盡還其官爵
順宗即位進同中書門下平章事檢校司空徙封濮陽
郡王元和四年死贈司徒而吳少陽代之

少陽者滄州清池人與少誠同在魏博軍相友善少誠

養以為弟署右職少陽度少誠猜忍請為外捍少誠乃表為申州刺史少誠病亟家奴單于熊兒矯召少陽至攝副使總軍事於是殺少誠子元慶自稱留後憲宗以王承宗方叛詔遂王為節度使以少陽領留後進拜節度使益畜馬劫掠招亡命以實其軍不肯朝然屢獻牧馬以自解帝亦因善之九年死子元濟匿不發喪以病聞偽表請元濟主兵遣醫往視即陽言少愈不得見有董重質者少誠壻勇悍久將善為兵元濟倚之先是其

屬蘇兆陽元卿侯惟清嘗勸少陽入朝元濟縊兆歸其屍而囚惟清元卿奏事在長安具言其事帝以二人者皆死贈惟清兵部尚書兆尚書右僕射少陽死四十日帝不為輟朝易將增戍以須變會傳言重質族殺元濟吉甫因請為少陽輟朝遣使賻贈元濟不得命乃悉兵四出焚舞陽及葉掠襄城陽翟剽係千餘里吊使至弗克入詔烏重胤兼汝州刺史引軍壓其境寧州刺史曹華為之副戍襄城李光顏為忠武節度使總兵臨屯折

山南東道詔節度使嚴綬為申光蔡等州招撫使下詔
奪元濟官爵趣諸道進討田弘正韓弘各遣子率兵隸
綬光顏軍綬屯蔡西鄙小勝不設備為賊襲敗於慈丘
退保唐州壽州刺史令狐通戰數北賊乃拔霍丘屠馬
塘通嬰城不敢出詔左金吾衛大將軍李文通代通會
裴度輔政賊始懼而元濟不能指授諸將趙昌凌朝江
董重質李祐李憲王覽趙晤王仁清等以便宜人自為
戰抗王師李師道餽鹽出入寧陵雍丘間韓弘知而不

禁文通與賊將王覽董重質戰史族岡戰覽光顏大破賊於時曲復與重脣合擊賊小潞河敗之天子責綬失律更以韓弘兼都統擢高霞寓唐鄧隋節度使十一年諸軍大合光顏壁掌河文通敗賊於固始拔鋤山霞寓戰朗山斬首千餘級次鐵城賊偽奔霞寓窮追伏發死傷畧盡退保新興賊圍之監軍李議誠馳救圍解還守唐州元濟以霞寓不足虞併兵備陳其秋文通以兵銜枚夜出九女原屠保壁三十所分兵西北並安陽山破

降萬餘執兩將光顏敗郾城兵二萬俘大將復與重脣
合攻凌雲柵拔之帝怒諸軍無大功詔內常侍梁守謙
宣慰因督戰付詔書五百以待有功斥金帛募死士進
拜光顏檢校尚書左僕射重脣右僕射度御史中丞韓
弘子公武御史大夫貶霞寓以袁滋代之滋懦不能軍
十二年更以李愬為唐鄧節度使元濟食盡士卒食
菱芡魚鼈皆竭至斲草根以給民四潰僑至郾城吳房
於行營以綏新附愬攻其西破屯柵十餘執丁士良吳

秀琳賊帥張伯良以兵三萬與光顏戰郾城大敗奔還
蔡曹華取青陵城斷郾歸路賊將鄧懷金送款愬又襲
破朗山執戍將梁希果平汶港等三壁元濟知衆數潰
而外失秀琳等因奉表請束身赴闕下帝許以不死元
濟取行營馬三百董重質不與故不果降愬畧興橋得
守將李祐不殺引至帳下計議始謀襲蔡自少誠盜蔡
四十年王師未嘗傳城下又嘗敗韓全義于頓以是無
所憚內恃陂浸重阻故合天下兵攻之三年纔克一二

縣帝命裴度為彰義節度兼申光蔡四面行營招撫使
梁守謙與諸將計先度未至立功諸將亟戰不勝度至
大勞將士皆感激請戰光顏每戰冠軍故元濟悉衆亢
時曲祐為愬謀曰蔡之守者市人疲卒耳勁兵皆在外
若直擣縣瓠賊成禽矣愬然之十月壬申以精騎夜襲
蔡坎垣入之戍者不知賊恃重質兵在洄曲不虞師至
及愬攻內城元濟始驚被甲乘城以待重質會重質降
愬而李進誠取賊庫兵即攻之明日

按此元和十二年
十月十六日也新

書原文上不紀年月但書明日未訢又紀書十二年十月癸酉李愬傳書十一年十月己卯吳鎮糾之今考平淮西碑及通鑑考異補識年月於前

燒其門民相率抱薪增火門壞執元

濟舉族傳知長安帝御興安門受俘羣臣稱賀以元濟獻廟社徇於市斬之年二十五夜失其首妻沈没入掖庭二弟三男子流江陵皆殺之斬其屬劉協庶趙晤王仁清等十餘人度還以馬摠為留後俄拜節度使析潞州隸陳許始度之出太子右庶子韓愈為行軍司馬帝美度功即命愈為平淮西碑愈以元濟之平繇度能固

天子意得不赦故諸將不敢首鼠卒禽之多歸功度而
愬特以入蔡功居第一愬妻唐安公主女也出入禁中

訴愈文不實帝重悟武臣心詔斷其文更命翰林學士

段文昌為之

按羅隱江東集有記石烈士一篇載李愬
給事人石孝忠推碑見帝訴愈文不實與

此不李祐以功遷神武將軍後擢夏綏銀宥節度使終

滄德景節度使檢校尚書左僕射帝迹董重質教元濟
亂欲誅之而李愬先許不死故貶春州司戶參軍凌朝
江播州司戶參軍是歲申蔡州始輸貢戶部以其久不

至請元日陳於廷

劉悟正臣孫也

按正臣事已見全諒傳
吳縝糾其叢複今刪

叔父全諒節度

宣武署牙將以罪奔潞州王虔休復署為將被病還東
都全諒積緡錢數百萬在馬悟破滕緡用之犯法繫河
南獄留守韋夏卿貸免李師古厚幣迎之從擊毬撞師
古馬仆將斬之悟盛氣不懼師古奇其才令將後軍妻
以從媚歷牙門右職師道被討使將兵屯曹田弘正兵
屯陽穀悟營潭趙城中飛語悟當為帥師道內疑數召

悟計事悟曰今與魏如角力者勢已交先退者負悟還
魏踵薄城下矣左右諫曰兵成敗未可知殺大將孰肯
為用師道然之或言悟且亂師道遣使責戰密語其副
張暹使斬悟暹以情告悟斬使者召諸將曰魏博兵彊
出則敗不出則死且天子所誅司空而已吾屬為驅迫
就死地孰若還兵取郛立大功轉危亡為富貴乎衆皆
唯唯因遣報弘正使進兵潭趙悟夜半薄西門黎明啟
而入殺師道并大將魏銑等數十人即拜悟義成節度

使封彭城郡王實封戶五百元和十五年來朝進檢校
兵部尚書穆宗立徙昭義軍朱克融亂移守盧龍至邢
州會王廷湊之變不得入還屯進兼幽鎮招討使治邢
州圍臨城觀望久不拔與監軍劉承偕不叶承偕與都
將張問謀縛悟送京師以問代悟知之以兵圍監軍殺
小使其屬賈直言質責悟曰李司空死有知使公所為
至此軍中將復有如公者矣悟遽謝曰吾不欲聞李司
空字即搗兵退匿承偕囚之

按吳縝糾謬云都將張問
賈直言傳作慈州刺史張

汝未知孰是又賈傳稱悟因直言諫能以臣節光明於
朝譽直言遂并譽悟失其實矣悟驕悍性成安知感悔
當以此傳所書為正帝重違其心貶丞偕悟自是頗專肆上書多

不恭負罪亡命者多歸之彊列其冤累進檢校司徒同
中書門下平章事實歷初巫者妄言師道以兵屯琉璃
陂悟惶恐自往求哀將易衣嘔血數斗死贈太尉表其
子從諫嗣從諫少狡獪師道使悟出屯署從諫門下別
奏從諫與師道諸奴日戲博交通具知陰事疏於悟故
悟得立功悟死從諫知留後賂當權者朝議謂上黨內

鎮與河朔異不可許左僕射李絳言悟匿死衆不必同
亂從諫威惠未著若詔北鎮大將領節度馳入軍謀自
屈矣時李逢吉王守澄納其賂數為請敬宗乃以晉王
為節度大使詔從諫主留事起將作監主簿檢校左散
騎常侍未幾拜節度使太和初李聽敗館陶走淺口從
諫救之得免進檢校尚書左僕射拜司空封沛國公昭
義自悟時治邢州而人思上黨從諫還治潞方年壯思
立功六年請入朝文宗待遇加等明年還藩進同中書

門下平章事公卿多託以私又見事柄不一遂心輕朝廷及甘露事宰相皆夷族從諫不平三上書請王涯等罪譏切中人時宦豎得志天子弱鄭覃李石新執政藉其論執以立權綱中人憚而怨之仇士良倡言從諫志窺伺從諫亦妄言清君側因與朝廷猜貳武宗立兼太子太師從諫畜馬高九尺獻之帝不納疑士良所沮怒殺馬益不平又聞士良寵方渥愈憂惑欲自入朝恐不脫禍因被病死年四十一贈太傅從子稹父從素任右

驍衛將軍從諫以為嗣病甚與妻裴謀令主軍事置大將王協郭誼劉武德劉守義等佐稹秘不發喪協謀請醫於朝中人與醫至從諫死已再旬稹曰公困草不任受詔中人曰卧而視可也辭以母夫人侍不可屏中人欲直入武德等戶之中人恐其變趨出後使者繼往為知從諫已死者未至數舍衆懼武德與蔣董可武出兵萬人迎勞至牙門不得前諸將乃詣監軍崔士康邊說請如河朔故事士康懦不敢拒乃至喪次扶出稹為裹

純巾曰毋更欲殺敕使諸將哄然笑遂出見三軍帝怒
前使者不入謫隸恭陵鎮所遣使三輩皆杖死京兆府
詔從素書敕鎮護喪還東都鎮不奉詔詔羣臣議李德
裕請討之詔奪從諫鎮官敕諸軍進討於是河陽王茂
元以兵屯萬善河東劉洸守昂車闕壁榆社魏博何弘
敬柵肥鄉侵平恩成德王元逵次臨洺略任堯山向城
河中陳夷行營冀城侵冀氏茂元別遣將營天井關為
賊將薛茂卿所破張巨進攻萬善不能下茂元欲走會

日暮賊自潰去詔忠武王宰以本軍入懷澤行營茂卿負戰勝冀厚賞或言其兵犯王畧深朝廷且怒節益不可至稹然之茂卿失望乃與宰通偽北委天井關奔澤州使謀告宰取澤吾應於內宰疑不進稹聞其貳台誅之宰進破劉公直拔陵川劉沔又取石會關李石代沔領河東稹因石兄洺州刺史恬移書乞降石以聞右拾遺崔碣請納之帝怒斥碣鄧城令詔取言罷兵者戮賊境上令石答書許稹面縛稹不出俄而楊弁逐石與稹

連和稹諸將建議我求承襲彼叛卒若與之是與反者
械其使送京師使康良佺屯鼓腰嶺敗太原兵生擒卒
七百帝猶不赦始從諫將死命稹無咎辱羣奴故李士
貴等與王協尤用事士有功不賞下無鬪志府中財貨
山積而協請稅商人使劉溪等分出檢實溪并取齊民
貲十二百姓始怨從諫妻弟裴問守邢州募兵五百號
夜飛將多豪姓子其家以輸貲不時為溪所囚問以為
言溪大怒問因殺溪與刺史崔嘏自歸成德軍王釗守

洺州給士帑布一端稹檄代歲稟釗謂衆曰庫物尚多
欲發以為賞可乎士皆喜悉所有給之送款魏博軍礪
州將高王堯山將魏元諛等以次降成德元逵以久為
賊守殺之稹聞三州降大懼郭誼與王協議圖稹使董
可武誘稹至北第置酒飲酣即斬首悉取從諫子在襪
襪者二十餘并從子積匡周等殺之誅張谷張沿陳揚
庭李仲京王渥王羽韓茂章茂實賈犀郭台甄戈十一
族夷之函稹首送王宰獻京師告廟社御興安門受之

劉公直亦降於宰相石雄以兵守境軍大掠誼移書責之
雄銜怒誼之死誼斥從諫妻伏夾室私收其貲建大廡
日望旌節宰相德裕建言誼庸下亂繇誼始及窮蹙乃
圖稹邀榮不誅無以懲宜及兵在境悉取逆黨送京師
論如法先是有狂人呼於潞市曰石雄七千人至矣從
諫捕誅之乃請詔雄率兵如數以入雄至潞縛誼及王
協劉公直安全慶李道德李佐堯劉武德董可武等送
京師並誅死杖崔士康殺之詔從諫且死乃署稹軍事

宜剖棺暴尸三日誼兗州人

按新書原文載從諫目尚開及郭誼兄弟葬地事文

類說家無闕勸德今州

張谷張沿陳揚庭皆有文谷納邯鄲人李


嚴女為侍人號新聲當從諫潛圖窺脅新聲諫谷曰從諫非有戰野攻城功直以其父挈齊十二州還天子未能奪其嗣耳自有澤潞未聞以一縷一蹄為天子壽章武朝數鎮顛覆皆雄才傑器尚不能固天子恩况從諫擢自兒女手中苟不以法得亦宜以不法終君當脫族西去大丈夫勿顧一飯恩以骨目腥健兒食谷畏言泄

縊之李仲京訓兄王涯播子王羽涯族孫韓茂章茂實
約子賈庠餽子耶台行餘子甘露難作皆羸服奔從諫
從諫衣食之甄戈者頗任俠自稱荆卿從諫與定州戍
將有嫌命戈斬其首他日又使取仇人乃十餘輩劫之
從諫不悅號偽荆卿從諫妻裴以弟立功詔貸其死刑
部侍郎劉三復執不可於是賜死按新書原文載裴氏勸從諫入朝為子孫
計上文裴與從諫謀令稹主軍勸夫忠順陷子不義且此時獨不知為子孫計耶自相矛盾今刪有李
佐之者兼孫也累調河南尉客路從諫留署觀察府支

使因娶其從姐妹從諫病佐之力諷使還東都從諫雖不能從然感服其言病且革王協等恐佐之妻母有所闕說即輦母歸東都會佐之叔告佐之漏軍中虛實鎮殺之武鄉令唐漢賓儉裔孫以稹拒命固請歸朝不聽舉族見害李師晦者本宗室子悟辟致幕府見從諫稍恣橫假言求長生術不與事從諫使歸東都師晦懼譖請居涉從諫不之疑稹敗有為帝言者擢伊闕令而贈薛茂卿博州刺史大中初又贈漢賓本縣令先時河北

諸將死皆先遣使弔祭次冊贈次近臣宣慰度軍便宜
乃與節軍中不許出乃用兵不半歲不能定故得為備
禎初不意帝怒即見計及茂元錄詔示禎舉族號慟欲
自歸而愚懦不決云自悟至禎三世凡二十六年李丕
者善長短術與從諫厚善署大將及禎阻命軍中疾其
才丕懼為游奕遂自歸議者疑為賊遣德裕奏言討賊
半年始有降者當賞以勸擢忻州刺史楊弁亂遣人誘
丕丕斬之以兵扼走集遷汾晉二州刺史大和中初拜振

武節度使檢校刑部尚書党項叛徙廊坊卒



欽定續通志卷二百八十

欽定四庫全書

史部

欽定續通志卷二百八十一至
四

中書_臣李采覆勘

總校官原任侍講臣王燕緒

欽定四庫全書

欽定續通志卷二百八十一

列傳

五代

敬翔

朱珍

龐師古

葛從周

霍存

張存敬

符道昭

劉捍

寇彥卿

康懷英

敬翔字子振同州馮翊人乾符中舉進士不中依同里人汴州觀察支使王發發無所薦引翔為人作牋刺傳軍中太祖愛之謂發曰聞君有故人可與俱來翔見太祖補以軍職非其所好乃以為館廂巡官太祖與蔡人戰汴郊翔為太祖謀多中太祖欣然以為得翔晚動靜輒問之昭宗自岐還長安召翔與李振升延喜樓勞之拜翔太府卿昭宗遷洛陽宴崇勲殿酒半起使人召太祖入內殿將有所托太祖懼辭以疾昭宗曰卿不欲來

可使敬翔來太祖遽麾翔出翔亦佯醉去太祖已破趙
匡凝取荆襄遂攻淮南翔切諫以謂新勝之兵宜持重
養威太祖不聽兵出光州遭大雨幾不得進進攻壽州
不克多所亡失太祖始大悔歸而忿躁殺唐大臣幾盡
益以翔為可信任梁之篡弑翔之謀為多太祖即位
改唐樞密院為崇政院以翔為使遷兵部尚書金鑾殿
大學士封平陽郡侯

據薛史增

翔從太祖用兵三十餘年盡

心勤勞晝夜不寐自言惟馬上乃得休息太祖剛暴難

近有不可翔未嘗顯言微聞其端太祖意悟多為之改
易太祖破徐州得時溥寵姬劉氏愛幸之劉氏故尚讓
妻也乃以妻翔翔貴劉氏猶侍太祖卧内車服驕侈別
置典謁交結藩鎮權貴往往附之寵信言事不下於翔
翔以太祖故雖患之而不能止太祖崩友珪立以翔先
帝謀臣懼圖己不欲翔居内職乃以李振代為崇政使
拜翔中書侍郎同中書門下平章事翔多稱疾未嘗省
事末帝即位趙巖等用事頗離間舊臣翔愈鬱鬱不得

志其後梁盡失河北與晉相拒楊劉翔曰故時河朔半
在以先帝之武御貔虎之臣猶不得志於晉今晉日益
彊梁日益削陛下處深宮中所與計事者皆近習親戚
而望成事乎臣聞晉攻楊劉李亞子負薪渡水為士卒
先陛下委蛇守文以儒雅自喜而遣賀瓌為將豈足當
彼餘鋒乎臣雖慙受國恩深若其乏材願自効嚴等以
翔為怨言遂不用王彥章敗於中都末帝懼召段凝於
河上凝顧望不來末帝遽呼翔曰朕居常忽卿言今急

矣勿以為懟卿其教我當安歸翔曰臣從先帝三十餘年雖為相實朱氏老奴事陛下如郎君敢有所隱陛下初用段凝臣已爭之今凝不來敵勢已迫欲為陛下謀小人間之必不見聽請先死不忍見宗廟之亡君臣相向慟哭翔與李振皆為太祖所信任莊宗入汴詔赦梁羣臣振喜謂翔曰有詔洗滌將朝新君邀翔俱翔夜止高頭車坊將旦左右報曰崇政李公入朝矣翔歎曰李振謬為丈夫矣復何面目入梁建國門乎乃自經死

朱珍徐州豐人少與龐師古等俱從梁太祖為盜太祖鎮宣武珍為太祖創軍制選將練兵甚有法梁敗黃巢破秦宗權東并兗鄆朱嘗不在戰中勇出諸將太祖與晉王東逐黃巢還過汴館之上源驛太祖使珍夜以兵攻之晉王亡去珍悉殺其麾下兵義成軍亂遣珍以兵趨滑州道大雪趣兵疾馳一夕至城下拔之秦宗權遣盧瑋張晁等攻梁時梁兵少數為宗權所困乃拜珍淄州刺史募兵於淄青得萬餘人以歸太祖大喜曰賊方

息兵養勇度吾兵少不出而未知珍來宜出其不意擊之敗晁等宗權由此敗亡梁軍威大振以得珍兵故也珍從太祖攻朱宣取曹州又取濮州刺史朱裕奔鄆太祖留珍攻之裕詐為降書隱約開門為內應珍信之軍入甕城垂門發鄆人從城上礮石投之兵皆死珍僅以身免太祖不之責魏博軍亂囚樂彥貞太祖遣珍救魏珍破黎陽臨河李固三鎮殺魏豹子軍二千於臨黃威振河朔梁攻徐州珍先下豐縣又敗時溥於吳康與李

唐賓等屯蕭縣唐賓者陝州陝人也初為尚讓偏將降梁每戰與珍俱珍小却唐賓佐之乃大勝珍嘗私迎家軍中太祖遣唐賓伺之珍與唐賓不協唐賓夜走還宣武珍單騎追之交訴太祖前太祖為和解之珍屯蕭聞太祖將至戒軍中治館廡唐賓部將嚴郊治廡失期軍吏督之郊訴於唐賓唐賓以讓珍珍怒拔劍起唐賓拂衣就珍珍即斬之遣使者告唐賓反太祖大驚敬翔為太祖畫佯收唐賓妻子下獄因如蕭珍迎謁遂執之諸

將霍存等十餘人叩頭救珍太祖大怒舉胡牀擲之曰
方珍殺唐賓時獨不救之耶存等退珍遂縊死

龐師古曹州南華人初名從梁太祖鎮武宣初得馬五
百匹為騎兵以師古將之從破黃巢秦宗權皆有功太
祖攻時溥未下留兵屬師古守之師古取宿遷進屯呂
梁敗其兵二萬孫儒逐楊行密取楊州太祖遣師古渡
淮攻儒為儒所敗是時朱珍李唐賓已死師古與霍存
分將其兵梁攻徐州太祖奪柳王友裕兵以屬師古師

古攻破徐斬溥表為徐州留後

按文苑英華有授龐從武寧平南節度使制非

留後也薛史亦作使而歐史通鑑皆作留後當從文苑英華及薛史為是攻鄆州臨濟水師

古徹木為橋夜先濟朱宣走中都見殺太祖已下克鄆

乃遣師古與葛從周攻楊行密於淮南師古出清口從

周出安豐師古自微時事太祖謹甚未嘗離左右為將

必受方畧以行軍中非太祖命不妄動師古營清口地勢

卑或請就高為柵師古以非太祖命不聽淮人決水浸

之請者告曰上流水至矣師古以為搖動士卒立斬之

已而水至兵不能戰遂見殺

葛從周字通美濮州鄆城人少從黃巢巢敗降梁從太祖攻蔡州太祖墜馬從周扶太祖復騎與敵步鬪傷面身被數創偏將張延壽從旁擊敵乃得脫太祖用從周延壽為大將從周與秦宗權戰於焦夷獲其將王洧從朱珍收兵淄青功為多李罕之召晉兵攻張全義於河陽太祖遣從周丁會等救之敗晉兵于沈河潞州馮霸殺晉守將李克恭以降梁太祖遣從周入潞州晉兵攻

之從周走河陽太祖攻魏從周與丁會先下黎陽臨河
會太祖於內黃敗魏兵於永定橋從丁會攻宿州以水
浸其城破之太祖攻朱瑾於兗州未下留從周圍之瑾
閉壁不出從周詐去夜潛還掩殺千餘人晉攻魏太祖
遣侯言救之言築壘洹水太祖怒言不出戰遣從周代
言從周並閉壘不出而鑿三閤門以待晉兵攻之從周
以精兵自閤門出擊敗之晉王怒自將擊從周從周雖
大敗而擒晉王子落落從攻鄆州擒朱宣於中都又攻

兗州走朱瑾太祖表為兗州留後以兗鄆兵攻淮南出
安豐會龐師古於清口行至濠州聞師古死遽還將渡
淝河淮兵追之亦大敗是時晉兵出山東攻相衛太祖
遣從周略地山東五日而下洺邢磁三州太祖表兼邢
州留後劉仁恭攻魏屠貝州從周會太祖救魏入於魏
州燕兵攻館陶門從周以五百騎出使閉門而後戰破
其八柵燕兵走追至臨清擁之御河溺死者甚衆太祖
以為宣義行軍司馬太祖遣從周攻劉守文於滄州仁

恭以燕兵援守文監軍將暉語諸將曰燕兵來不可迎
戰宜縱其入城聚食倉廩使兩困而後取之諸將頗以
為然從周怒曰兵在上將豈監軍所得言且勝敗之機
暉豈足以知之乃勒兵逆戰於老鵝隄大敗燕軍時守
文亦求救於晉晉為攻邢洺以牽之從周遽還敗晉兵
於青山口遂從太祖攻鎮州下臨城王鎔乞盟太祖表
為秦寧軍節度使從氏叔琮攻晉太原不克梁兵西攻
鳳翔青州王師範遣其將劉鄩襲兗州太祖還遣從周

攻鄆卒招降之太祖即位拜左金吾衛上將軍以疾致仕居偃師末帝即位拜昭義軍節度使封陳留郡王食俸於家卒贈太尉

霍存洺州曲周人少從黃巢巢敗降梁驍勇善騎射秦宗權攻汴存連破張晔秦賢從朱珍掠淄青龐師古攻時溥皆有功朱珍李唐賓死乃以龐師古代珍存代唐賓以攻溥敗之碭山又與葛從周丁會下宿州從攻潞州與晉人遇戰馬牢川存入則前出則殿晉人却遂東

攻魏取淇門梁得曹州以存為刺史兼諸軍都指揮使
梁攻鄆州朱瑾求救存伏兵蕭縣擊之敗瑾等於石佛
山存中流矢卒太祖已即位閱騎兵於繁臺顧諸將曰
使霍存在豈勞吾親閱耶諸君寧復思之乎他日語又
如此

張存敬譙郡人少事梁太祖為將李罕之攻張全義太
祖遣存敬與丁會等救之罕之解圍去以存敬為諸軍
都虞候太祖攻徐克以為行營都指揮使從葛從周攻

滄州敗劉仁恭於老鷄隄還攻王鎔於鎮州入其城取
馬牛萬計遷宋州刺史復從諸將攻幽州取其瀛漠祁
景四州梁攻定州與王處直戰懷德駙大敗之已下鎮
定乃遣攻王珂於河中下晉絳二州珂降太祖表存敬
護國軍留後復徙宋州刺史未至卒於河中贈太傅子
仁愿有孝行存敬卒事其兄仁穎如事父禮尤曉法令
事梁唐晉常為大理卿

符道昭蔡州人為秦宗權騎將宗權敗依鳳翔李茂貞

茂貞養以為子名繼遠梁攻茂貞道昭戰屢敗乃歸蔡
太祖表為秦州節度使以亂不果行太祖為元帥初開
府而李周彝以鄜州降為左司馬難其右及得道昭乃
授之羅紹威將誅其牙兵惡魏兵彊求梁為助太祖乃
悉發魏兵攻燕而遣馬嗣勳助誅牙兵牙兵已誅魏兵
在外聞之皆亂魏將左行遷據厯亭史仁遇據高唐以
叛道昭等從太祖悉破之道昭勇於犯敵而少成算每
戰先發多敗周彝等繼之乃勝開平元年與康懷英等

攻潞州築夾城為蚰蜒塹以圍之逾年不能下晉兵攻
破夾城道昭戰死

劉捍開封人事太祖為客將從朱珍募兵淄青太祖北
攻鎮州與王鎔和遣捍見鎔鎔方嚴兵捍馳一騎入城
諭意鎔聽命梁兵攻定州降王處直捍復以一騎入慰
太祖圍鳳翔遣捍入見李茂貞計事唐昭宗召見問梁
軍中事稱旨拜登州刺史梁兵攻淮南捍作浮橋以渡
師拜宋州刺史太祖即位累遷左龍虎統軍出為佑國

軍留後同州劉知俊反以賂誘捍將吏執捍去械送李
茂貞見殺贈大傳

寇彥卿字俊臣開封人世事宣武軍為牙將太祖以為
通引官累遷右長直都指揮使領洺州刺史羅紹威將
誅牙軍太祖遣彥卿之魏計事彥卿陰為計畫乃悉誅
牙軍彥卿善伺太祖意動作皆如旨太祖嘗曰敬翔劉
捍寇彥卿皆天為我生之賜以所乘愛馬一丈烏太祖
圍鳳翔以彥卿為都排陣使彥卿乘馬馳突陣前太祖

目之曰真神將也

按通鑑開平二年帝從吳越王錢鏐之請以亳州團練使寇彥卿為東南

面行營都指揮使擊淮南襲霍邱又九國志朱景傳亦載梁祖命寇彥卿率勁騎襲霍邱彥卿負神將名而傳

無軍事可紀薛史亦失載謹補注於此太祖遷唐都洛陽遣彥卿奉表迫

驅上道

按五代史原文載遷都事甚詳已見唐崔胤傳此從其略蓋通史不必複紀也太祖即

位拜彥卿感化軍節度使歲餘召為左金吾衛大將軍

充金吾衛仗使彥卿晨朝至天津橋民梁現不避道前

驅梓投橋上石欄以死彥卿見太祖自首詔彥卿以錢

償現家御史司憲崔沂請論如法太祖不得已責授彥

卿左衛中郎將復拜襄州防禦使遷河陽節度使末帝即位徙鎮威勝卒年五十七

康懷英

按通鑑作懷貞蓋本名後避末帝諱改

兗州人事朱瑾為牙將梁

兵攻瑾瑾出略食豐沛間留懷英守城懷英即以城降後從氏叔琮攻趙匡凝下鄆州梁攻李茂貞於岐以為先鋒至武功擊殺岐兵萬餘人李周彝以郿坊兵救岐懷英擊走之因取其翟州岐兵屯奉天懷英柵其東北夜半岐兵擊之懷英不欲驚他軍獨以三千人出戰遲

明岐兵解去身被十餘創楊行密攻宿州太祖遣懷英擊走之表宿州刺史遷保義軍節度使丁會以潞州叛降晉太祖命懷英為招討使將行戒之甚切懷英惶恐期必得潞州以報築夾城圍之晉遣周德威屯亂柳數攻夾城懷英不敢出戰太祖乃以李思安代降懷英為都虞候思安亦無功太祖大怒罷思安以同州劉知俊為招討使知俊未至軍太祖自至澤州為懷英等軍援且督之已而晉王李克用卒莊宗召周德威還太原太

祖聞晉有喪德威去亦歸洛陽諸將皆少弛莊宗與德威等疾馳六日伏兵三垂岡直趨夾城破之懷英大敗以百騎遁歸詣關請死太祖曰去歲興兵太陰虧食占者以為不利吾獨違之而致敗非爾過也釋以為右衛上將軍劉知俊叛奔岐以懷英為保義軍節度使西路副招討使知俊以岐兵圍靈武太祖遣懷英攻邠寧以牽之取寧慶行三州還至昇平知俊掩擊之遂大敗徙鎮感化討朱友謙之叛與晉人戰又大敗徙鎮永平卒

欽定續通志卷二百八十一